



Marzhin Barzh

Lois June Wickstrom

ha

Christian Souchon

MARZHIN BARZH

Gwechalll-gozh e penn kornog an Europa, e Breizh Izel, e oa ur roue ha Boudik e anv..

Mestr ar vro a oa ha mestr ar marc'heien a divenne an dud.

Hogen an dud ne gare ket anezañ; biskoaz n'ee dezañ evit ali na glaske digantañ bennoz Doue gant o euredoù pe o bugaligoù nevez-ganet. An divinour Marzhin a oa an hini a gare hag eñ a oa ur gwerzaouer, ur barzh.

Enoret braz a oa Marzhin gant an dud abalamour d'ar gwerzioù souezhus a ouie kana ouzh e delenn aour. Gouzoud a ree penaos ober traou burzuduz gant e vizoù hud ha diouganiñ evit mad e vro..

E pep lec'h ez ee, e veze degemeret mad hag e ve klevet an holl o youc'hal. An dud a roe dezhañ boued saourek da zebriñ hag ur wele flour da gousked ennañ.

Oazus a oa ar Roue Boudik. Prederiañ a ree noz ha deiz: Penaos e deufe da veza karet gant ar bobl? Hag un deiz, war e veno, e oa ar respont kavet: en em zizober euz-a Varzhin!.

Ne oa ket ês avad, rag un divinour a oa Marzhin! Ken evit ma c'helle e tapoud, red a oa d'ar Roue Boudik laerez e vizoù hud hag e delenn aour a oa gantañ. Galloud a refe neuze e lakaat en toull-bac'h pe forbannañ pell diouzh e vro.

Hag ur roue ne oa ket gouest d'ober kement-se e-unan. Divinourien zo galloudezhoù ganto a vank d'ar roueed. Red a oa d'ar Roue kavout skoazell ha sikour!

N'e-noa ket c'hoant avad da ziskouez sklaer petra oa en e sonj. Ma glevfe Marzhin euz e mennozh, en em saveteiñ a refe gant e skiant hud. Setu perag e lakas en e benn da widreal: Lakaat ur redadeg vraz evit kavout un den yaouank gouest da drec'hiñ Marzhin. Touellañ a refe hemañ gant un donezon ur roue hepken a c'hell ober: ur vro da veza tiern warni. Ha pa vefe sur da vout karet gant an den yaouank-se, lakaat a rafe e c'hriped ha lared dezhañ: "Marzhin a zo da enebour ha te fell dit e pellaat da viken, rag ema Marzhin an hini an dud a gar, e-lec'h o ziern. Peotramant biken ne ri gouarniñ evit gwir ar vro am-eus prometet dit! ».

Ar fest a zache an holl dud yaouank deus levioù tro-war-dro. Ar wellañ anezho a genstrive evit diskouez o nerzh hag ampartiz. Neb a vefe gouest da flipañ telenn ha gwalenn Varzhin, a vefe red dezhañ tec'hel kuit prest-prest goude. Setu perag ar Roue Boudik a lakas ur redadeg evit ar varc'herien. E ijin a oa o vont en-dro. Trec'her ar redadeg a deufe da veza tiern Bro Leon ha merc'h ar Roue, Linor, e-nefe da bried.

Un divinour yaouank, e mamm-gozh a oa un divinourez ivez, e-noa c'hoant da veza un tiern hag un tiern dimezet. Ur marc'her ampart a oa ouzhpenn. Pa glevas eus ar redadeg, ouzh e vamm-gozh e c'houlennas da vont eno.

Ar gwerz-mañ zo savet war-benn ar Roue Boudik, Marzhin, an den yaouank hag e vamm-gozh...



I Ar Fest

- Va mamm-gozh paour, va selaouit!
Dar fest em-eus c'hoant da voned!,

D'ar fest, d'ar redadeg nevez
A zo laket gant ar Roué! -

- D'ar redadeg ned eoc'h ket!
D'ar fest-mañ na da fest ebed.

Ned eoc'h ket d'ar fest nevez,
Gouelañ 'peus graet 'hed an noz-mañ.

Ned eoc'h ket mar dalc'h ganin,
Gouelañ 'peus graet en hoc'h huñvre. -

- Va mammig paour, mar am c'harit,
D'ar fest em lezoc'h da voned!

- O vond d'ar fest, c'hwi a gano,
O tont en-dro c'hwi a ouelo! -



Ned eoc'h ket d'ar fest nevez..

II Ar Redadeg

E ebeul ruz e-neus sterniet
Gant direnn flamm 'neus e houarnet.

Ur c'habestr 'neus laketa 'n e benn,
Hag un dorchenn skañv war e gein.

E kerc'henn e c'houg ur walenn
Hag en-dro d'e lost ur seizenn.

Ha war e c'horre 'ma pignet
Hag er fest nevez 'ma digouet!



Er park ar fest pa oa digouet,
Oa ar c'hern-bual o sonet,

Hag an holl dud en ur bagad,
Hag an holl virc'hed o lampad.



Hag an holl virc'hed o lampad

**"An hini e-nevo treuzet
Kleuz bras park ar fest en ur red,**

En ul lamm klok, distag ha nêt,
Merc'h ar Roue 'nevo da bried!"



E ebeulig ruz pa glevas:
A-bouez e benn a gristilhas;

Lammed a reas ha konnariñ,
Ha teurel c'hwezh-tan gant e fri.

Ha luc'hed gant e zaoulagad,
Ha darc'h en douar gant e droad...

Kén e oa ar re all trec'het,
Hag ar c'hleuz treuzet en ur red!



Ar c'hleuz oa treuzet en ur red



Va merc'h Linor n'ho-pezo ket!

- Aotrou Roue, 'vel 'peus touet
Ho merc'h Linor 'rankan kavoud! -

- Va merc'h Linor n'ho-pezo ket,
Na den eveldoc'h kennebeud!,

N'eo ket **kelc'hierien** a fell din,
Da reiñ da bried d'am merc'h-me! -



Un **ozhac'h** kozh a oa eno,
Ha gantañ ur pikol barv,

Ur barv en e chik gwenn-kann
Gwennoc'h eged gloan war al lann,.

Hag eñ gwisket gant ur sae c'hloan
Bordet penn-da-benn gant arc'hant.

Hag eñ en tu dehoù d'ar Roué,
Outañ a c'hougomze neuze.

Ar Roué p'e-neus eñ glevet
Dre deir gwech gant e vazh 'neus skoet.

Teir gwech gant e vazh war an daol,
Ken e lakas selaou an holl.

- **Mar gasez din telenn Varzhin,**
Dalc'het gant peder sug aour fin,

Mar gasez e delenn din-me,
'Zo staget e penn e wele,

Mar he distagez, a-neuze,
Az-pezo va merc'h, **marteze!** -



Mar gasez din telenn Varzhin...

III An Delenn

- Va mamm gozh paour, mar am c'harit!
Un ali din-me a rofoc'h!

Va mamm gozh paour, mar am c'harit,
Rag va c'halonig 'zo rannet!-

- Mar ho-pije ouzhin sentet,
Ho kalon ne vije rannet...

Va mabig paour, na ouelit ket,
An delenn a vo distaget!

Na ouelit ket, va mabig paour,
Setu amañ **ur morzhol aour**.

N'eus tra ebed hag a drouzfe
Dindan taolioù ar morzhol-se. -



Telenn Varzhin e penn e wele

IV Ar Walenn



If you bring his ring to my house

- Eurvad ha joa 'barzh an ti-mañ!
Setu me digouet adarre!

Setu me deuet adarre
Ha telenn Varzhin ganin-me! -

Mab ar roue 'dal m'e glevas,
Ouzh ar roué a c'hourgomzas.

Ar roué pa 'neus e glevet,
D'an den yaouank e-neus laret:

- Mar gasez din-me e vizoù
A zo gantañ 'n e zorn dehoù,

Mar gasez e vizoù din-me,
T'az-po va merc'h diganin-me! -



Hag eñ da vont o ouelañ druz,
Da gaout e vamm-gozh diouzh-tu.

-An aotrou Roue e-noa laret,
Ha padal e-neus dislaret! -

- Na chif ket evit kement-se!
Tap ar skoultrig a zo aze,



A zo aze 'barzh va arc'hig
Hag ennañ daouzeg deliennig.

Hag ennañ **daouzeg delienn grenn**
Hag l ken kaer hag aour melen:

Hag on bet seizh noz d'e gerc'hat,
Seizh vloaz tremenet e seizh koad .



Pa gano 'r **c'hog da hanter-noz**,
Ho marc'h ruz 'vo oc'h ho kortoz.

N'eus ket da gaoud aon ebed
Marzhin barzh ne zihuno ket. -



Pa 'gane 'r c'hog 'kreiz an noz du,
'Lamme war an hent ar marc'h du;

N'e-noa ket ar c'hog peurganet
Pa oa bizoù Marzhin lammet.



Pa oa bizoù Marzhin lammet

V Ar Goulenn Diwezhañ

Antronoz pa darzhas an deiz,
Oa aet da gaout ar Roue.

Hag ar Roue 'dal m'e welas
Chomas en e sav, souezhet braz,

Souezhet hag an holl eveltañ;
- **Setu gonet e wreg gantañ !** -



Hag eñ mont un tammig er-maez,
E vab d'e heul hag an oac'h kaezh.

Hag l da zont gantañ en-dro
Unan a-gleiz, unan a-zehoù.



Degas Marzhin Barzh dre em lez

- Gwir eo, va mab, pezh 'teus klevet:
Da c'hwreg hirio 'teus gonezet!

Hogen un dra c'hoazh a c'houlan;
Hemañ a vo an diwezhañ.

Mar deu'z da ober kement-se:
'Vezi gwir mab-kaer ar Roue!

Te az-po va merc'h hag ouzhpenn;
An holl vro Leon, dre va ouenn!

Digas Marzhin Barzh tre em lez
Da veuliñ ar briedelezh!. -



VI Pakadeg Varzhin



Da belec'h ez-te diskabell ha diarc'hen?

- Marzhin Barzh a belec'h e teuez
Toullet da zilhad treuz-didreuz?

Da belec'h ez-te evel-henn,
Diskabell-kaer ha diarc'hen?

Da belec'h ez-te evel-henn,
Marzhin gozh, gant da bazh kelenn?



- Mond a ran da glask va zelenn,
Frealz va c'halon er bed-mañ.

Va zelenn koulz ha va bizoù.
Pe re am-eus kollet o-daou. -





Deut tre da zebri un tamm boued ganin!

- Marzhin, Marzhin na chifit ket!
Ho telenn ned eo ket kollet!

Ho telenn ned eo ket kollet
Nag ho pizoù aour kennnebeud.

Deut tre en ti, deut tre, Marzhin!
Da zebri un tamm boued ganin! -



- Mont gant va hent ne zalein,
Na tamm boued ebed e zebrin.

Ne zbrin tamm boued war ar bed;
Ken n'am-bo va zelenn kavet! -



- Marzhin, Marzhin, ouzhin sentit,
Ho telenn a vezo kavet. -

Pegen 'ma bet pedet ganti,
Kement maz eo deut tre an ti.



Ken na zigouezhas d'abardaez,
Mab bihan ar wrac'h kozh hag eñ tre.

Hag eñ da skrijal, spontet bras
En-dro d'an oaled pa zellas,

O welled Marzhin Barzh kluchet,
E benn war e gallon stouet.

Oc'h e welled war an oaled,
N'ouie doare pelec'h tec'hed.

- Tavit, va mab, na spontit ket;
Gant ar morgousk emañ dalc'het;

Lonket e-neus **tri aval ruz**
'M'eus poazhet dezhañ el ludu,



Gant ar morgousk emañ dalc'het!

Lonket e-neus va avaloù
Setu eñ d'hon heul e pep bro! -



VII An Embanner

Ar Rouanez a c'houlenne,
Gant he loufren eus he gwele:

- Petra c'hoari gant ar ger-mañ?
Pe safar a glevan amañ?

Paz on dihunet kén 'bred-se,
Kén a gren postoù va gwele?

Petra zo digouet barzh ar porzh?
Gant an du eno 'youc'hal forzh? -

- C'hoari gaer zo er ger-mañ
Gant **Marzhin** o tont en ti-mañ,

Ur wrac'hig kozh, gwenn-kann razañ
Hagd ho mab-kaer ivez gantañ. -



Marzhin o tont en ti-mañ



Ar Roue e-neus he c'hlevet.
Hag eñ er-maez prim da weled.

- Sav alese, embanner mat,
Sav deus da wele ha timat!

Ha kae da gemenn dre ar vro:
Dont d'an eured néb a garo!

Dont d'an eured merc'h ar Roue,
A vo dimeet a-benn eiz deiz!

Dont d'an eured, tudjentiled,
Kement zo e Breizh hed-da-hed,

Tudjentiled ha barnerien,
Tud a Iliz ha marc'heien,

A da gentañ ar Gonted-vor...
An dud pinvidig, an dud paour!

Kae, buan ha skañv dre ar vro,
Kannadour, ha deus skañv en-dro! -



Dont d'an eured néb a garo!

VIII An Eured



Tudjentiled ha barnerien...

- Selaouit holl, O, selaouit,
Ma ho-peus diouskouarn da gleved !

Selaouit holl hag e klevoc'h
Ar pezh a zo gourc'hemennet.:

Dont d'an eured merc'h er Roue,
Neb a garo, a-benn eiz deiz,

Dont d'an eured, bras ha bihan!
Kement a zo er c'hanton-mañ!

Dont d'an eured, tudjentiled,
Kement zo e Breizh hed-da-hed,

Tudjentiled ha barnerien,
Tud an Iliz ha marc'heien,

Ha da gentañ ar Gonted-vor,
Ar re binvidig, ar re baour!

Ha re binvidig ha re baour
Ne vanko nag arc'hant nag aour,

Ne vanko na kig na bara,
Na gwin na dourvel da evañ!

Na skabelloù da azezañ
Na paotred skañv d'ho servijañ.

Daou c'hant penn-moc'h a vo lazhet
Ha daou c'hant kole bet lardet,

Daou c'hant ounner, ha kant karo
A gement koad a zo er vro.


Daou c'hant ejen, kant du, kant gwenn
Vo roet o c'hrec'hin dre rann grenn.

Kant sae a vo, hag a c'hloan gwenn,
A vo roet d'ar veleien.

Ha karkanioù aour a vo kant,
Vo roet d'ar varc'heien goant;



Kant karo a gement koad a zo er vro



Marzhin a veul ar briedelezh

Mantili glaz vo leizh ur zal,
Da reiñ d'ar merc'hed da vragal.

Hag eizh kant bragoù nevez-c'hraet
Da reiñ d'an dud paour da wisked.

Ha kant soner war o zorchenn
O son noz-deiz war an dachenn;

Ha Marzhin Barzh e kreiz al lez,
O veuliñ ar briedelezh!

C'hoari awalc'h a vo eno,
Kemend-all birviken ne vo! -



IX Marzhin zo Kollet

- Klevit, keginour, me ho ped,
Hag an eured zo echuet?

-An eured a zo echuet
Hag an holl traou zo peurlipet.

Pemzeg devezh he-deus padet.
Ha dudi awalc'h a zo bet.

Aet int kuit holl gant profoù mad
Gant skoaz ar Roue hag e gimiad.

Hag e vab-kaer da vro Leon,
Gant e bried, drev e galon.




Aet int holl kuit ha laouen naet,
Nemed ar Roue, ned eo ket:

Marzhin c'hoazh ur wech zo kollet.
N'ouzer doare pelec'h 'mañ aet. —



E vab-kaer da Vro Leon gant e bried...

TON, KOUBLAD KENTAÑ ha DISKAN



[Bienvenue chez Ch.Souchon](#)

Taolenn

MARZHIN BARZH	1
I Ar Fest	3
II Ar Redadeg	4
III An Delenn	8
IV Ar Walenn	9
V Ar goulenn diwezhañ	12
VI Pakadeg Varzhin	14
VII An Embanner	19
VIII An Eured	21
IX Marzhin zo Kollet	24

Troet eus yezh Kerne (Barzaz Breiz Kervarker) gant Christian Souchon Raklavar gant Lois June Wickstrom © 2004
Skeudennoù tennet eus “Lavar ar Gral” gant Chrétien de Troyes hag “ Eurioù pinvidig-mor Duk Berri”

